

國子監志

第 三 冊

卷之八十一
志餘一
紀事
卷之八十二
志餘二
綴聞

國子監志卷八十一

志餘

臣等伏惟成均習禮之區。多士以稱先則古者也。一事之逸。一談之美。實事求是者有取焉。而不可以州部分也。太史采書軼見於他說。班固述志。有雜家者流。本其意謹誌紀事。綴聞為志。餘而以引用書目附焉。

志餘一

紀事



諸生肄業太學恭遇

聖駕臨雍得以瞻覲

天顏其他皆不與惟乾隆甲子

駕幸貢院諸生與禮部會試舉人在貢院甑門跪迎

聖駕各蒙

賜六經一部又乾隆辛未辛巳辛卯三逢

孝聖憲皇后萬壽諸臣於西直門至西安門祇候

高宗純皇帝奉

安輿由

圓明園還宮諸臣各按分定處所跪迎國子監祭

酒司業并合屬官員於西直門通衢之西率領

諸生具公服跪於道左辛巳適琉球官生在監

肄業情殷瞻仰呈請代奏荷蒙

俞允亦得與焉

凡

國家有大典禮六館諸生沐浴膏澤往往作為詩

歌頌美太平監臣為之裒潢成冊進呈

御覽乾隆年疊遇

孝聖憲皇后慈壽

高宗純皇帝萬壽暨

文廟落成

肇建辟雍

講學禮成嘉慶年

仁宗睿皇帝臨雍講學黌序歡騰士林歌詠洵稱太平

盛事

凡遇

臨雍禮成監臣及諸生渥荷

賞賚當即具表謝

恩衍聖公謝表例由臣監撰擬乾隆三十四年

文廟工成祭酒司業率滿漢屬員八旗教習內外班

肄業諸生官學生等赴

圓明園宮門具摺謝

恩又乾隆元年十七年二十六年三十五年四十四年

五十四年五十九年六十年嘉慶五年十三年

二十三年道光元年十一年

特旨開科國子監祭酒司業率領諸生及監丞等官之

與會試者恭赴

天安門謝

恩

凡遇

講學禮成祭酒先領官生赴成賢街祇候送

駕乾隆五十年

高宗純皇帝臨雍講學畢

垂問進講官一律

賜茶維時祭酒已遵奏定儀注先赴成賢街送

駕不與

特命議處部臣嗣後進講祭酒得與

賜茶禮

凡修

文廟先期

遣官告祭敬移

神牌國子監派員率教習肄業諸生官學生恭謹手

捧不假手吏役以昭誠敬乾隆三十二年重修

文廟

遣大學士尹繼善告祭本監派助教博士等十六員以八員手奉

至聖先師牌於彝倫堂正中安置再備八員更代四配每位各用教習貢生四人十二哲每位各用肄業諸生四人手奉安置彝倫堂左右如

文廟正殿位次兩廡每位各用官學生二人手奉於率性修道兩堂安置悉如東西廡位次

崇聖祠五王祇請

御書樓安置

正殿每位用官四員配哲廡每位各用肄業諸生二人悉如

崇聖祠位次三十三年

文廟工成祇請

還位如前儀

謹案康熙四十二年修

文廟

先師神位移奉順天府學五十二年修

文廟

先師神位移奉敬一亭中并誌

凡春秋二丁分胙

遣官應分猪首連肩牛首羊腿羊尾鹿脯和羹饌盤
飲福受胙牛塊煮羹牛猪一羊一豚拍如

遣親王則應分全牛一分獻翰林官二員猪蹄各一
羊腿各一監祭監宰監禮御史共六員各猪胙
二斤羊胙一斤禮部監宰官猪胙二斤羊胙二
斤宗人府猪一內閣猪二羊一吏部猪一羊半
戶部猪胙十二斤羊胙五斤禮部猪胙十二斤

羊胙五斤兵部猪胙六斤羊胙五斤刑部猪胙
十二斤羊胙五斤工部猪胙六斤羊胙五斤理
藩院猪胙六斤都察院猪胙十五斤羊胙十斤
六科猪胙各五斤通政司猪胙三斤羊胙二斤
大理寺猪胙三斤羊胙二斤太常寺猪一羊一
起居注猪胙三斤羊胙二斤翰林院猪胙十八
斤詹事府猪胙三斤羊胙二斤光祿寺猪胙五
斤羊胙四斤太僕寺猪蹄二個羊胙二斤順天
府猪胙二斤羊胙二斤鴻臚寺猪胙六斤欽天

監猪胙二斤。太醫院猪胙二斤。鑿儀衛猪胙六斤。羊胙三斤。本監堂屬官員教習肄業諸生執事各生。并吏役兵丁人等。統俟各處分訖。按等次酌量勻分。皆典簿廳掌之。即於是日禮畢後。具文派役分送。不得遲至次日。以褻

神惠

貢監生公服。冠頂鏤花金座。上銜金雀。公服袍青綢為之。藍緣披領。如袍飾。俱與舉人同。貢生吉服。冠頂金座。上銜花金。監生吉服。冠頂用素

銀

謹案乾隆三十一年。

皇朝禮器圖式。貢生例用鏤花金頂銀托。道光八年。禮部議准。照八品官例。用陰文鏤花金頂。毋庸更用銀托。以示區別。

學正學錄。秩正八品。嘉慶五年。

特諭進士舉人。例應截取選用知縣。其頂帶本係七品。

准其戴用素金頂。以符出身。

凡

臨雍聽講守部進士舉人迎

駕穿朝服觀禮更采服仍穿采服送

駕各學副管教長教習候補教習舉人并有職之各

氏後裔貢監生穿補服無職之各氏後裔及貢

監生穿藍鑲青衫披領金雀高頂在監肄業之

廩生照所得品級補服穿戴官學生宗學照

賞給頂帶世職照所襲品級穿補服貢監穿藍鑲青

衫披領金雀高頂生員童生穿青鑲藍衫披領

銀雀高頂

翰詹科道衙門堂屬官員俱於堂上設座各部
則無之惟臣監祭酒正坐司業僉坐監丞助教
等官旁坐如係兩廂講課六堂諸生皆坐而聽
講

凡六堂諸生遇封印開印兩廂官到任及充補
教習謁堂行四起四拜禮其餘上堂只三揖雖
有稟請不下跪

國子監祭酒司業各就翰林院衙門前後輩相
稱呼其與大學士尚書侍郎各照京堂之例具

帖。監丞以下等官與祭酒司業俱用官銜帖。祭酒

用呈字上銜司業用正字下銜與大學士尚書吏禮二部侍郎

用官銜帖。與四部侍郎及四品各京堂用晚生

帖。五品京堂用侍生帖。

謹案。

本朝禁稱座師門生。惟國子監祭酒司業則刺謁

直書門生。餘用光名。

詞林典故載京官稱前後輩者。翰詹而外內閣

吏部禮部都察院國子監有之。今國子監惟六

堂稱前後輩。

王士禎池北偶談云。祭酒四品與講讀學士較

俸陞遷。朝班則坐學士下。兩坊庶子上。康熙二

十年正月。

賜宴乾清宮。坐次在東面西。與朝班同。二十年七月。

賜宴瀛臺。在南面北。則序坐於太常卿僉都御史今之

下。太僕卿光祿卿之上。

凡

恩賜書籍。或合監數部。或每堂數部。或每旗學數部。

俱交各所司收貯聽生徒取閱惟乾隆八年

高宗純皇帝恭謁

三陵

御製

盛京賦刊刻成卷

賜國子監肄業諸生人各一部則出自

特恩焉

國朝崇尚文治優待官生其由經學保舉給司業

銜者為陳祖范顧棟高顧旋以

南巡接

駕賞祭酒銜助教授司業者為曹洛禋學正授司業者

為王延年訓導年至百歲給司業銜在籍食俸

者為王世芳訓導纂修四庫全書給助教銜食

單俸者為張羲年壽至百歲給學正銜者為詹

星斗貢生手書十三經給學正銜者為蔣振生

原名衡校刊石經收掌授學正者為蔣和其自乾

隆十七年壬申

孝聖憲皇后萬壽恩科會試給年老士子張簡等十人

學正銜後沿為定例。歷科姓名詳載會典。至以監丞改庶吉士者為王崇簡。杜芳。周爰訪。張丕吉。魏天賞。喬庭桂。岳映斗。官學生授編修者為王繼文。靳輔。劉兆麒。張長庚。既幸遭際之隆。彌見

盛世收材之廣

太學鐘鼓之名由來舊矣。國子監有鐘一。鼓一。鼓房在東廳之南。鐘房在西廳之南。乾隆三十年重修

文廟移庫。又得銅鐘一。銘文皆道家語。非太學所用之物。移交內務府存貯。

彝倫堂月臺東南立日晷一座。考明代

文廟國子監創建記已載有此。今八旗官學亦各立之。蓋講學問業考課俱有一定時候。憑此以知早暮焉。

乾隆甲午科助教吳省蘭。學正徐立綱。汪如藻。以舉人未與考差。得充內簾同考官。次年乙未科。徐汪皆捷進士。入詞館。吳以戊戌科

賜一體殿試亦與館選

彝倫堂露臺下槐柏林立乾隆四十八年

肇建辟雍辦理工程處奏准基內應去大小樹五十一

株材堪取料者用昇工師其餘青枝嫩葉者移

植太學門外左右柏樹各七株

雍和宮小柏九株小槐十三株

凡遇

視學之日

釋奠禮畢

聖駕出大成門入大次更衣禮部奏請講學

聖駕出大次至門外乘輿由國子監中門入

御彝倫堂行

講學禮乾隆五十年

高宗純皇帝肇建辟雍

臨雍講學先期准辦理

辟雍工程處知照開

大成殿西掖中間為穿堂旁啟後牆門及繩愆廳

後牆門

釋奠禮畢

聖駕由此

詣彝倫堂東次間

暖閣閣內恭設

寶座更衣用膳

附

元

京都未有

孔子廟而國學寓他署丞相順德忠獻王哈喇哈斯

喟然曰首善之地風化攸出不可怠乃奏營廟

學嘗躬為臨視既成朝野瞻聳選名儒為學官

奏遣近臣子弟入學而四方來學者益眾元名臣事

略

至元八年許衡授集賢大學士國子祭酒即南

城之舊樞密院設學奏召舊弟子散居四方者

王梓韓思永蘇郁耶律有尚孫安高凝姚燧及

其弟燾劉季偉呂端善劉安中白棟皆驛致館

下為伴讀。國學事蹟

大德六年。尚野遷國子助教。升博士。誨人先經學而後文藝。每謂諸生曰。學未有得。徒事華藻。若持錢買水。所取有限。能自鑿井及泉而汲之。不可勝用矣。時學舍未建。野密請御史臺乞出帑藏所積。大建學舍。以廣教育。至大元年。除國子司業。近臣奏分國學西序為大都路學。帝已可其奏。野謂國學府學混居不合禮制。事遂寢。

元史本傳

至正元年。大興國子監。蒙古回回漢人三監生員凡千餘。然祭酒司業博士多非其人。惟粉飾章句。補苴時務。以應故事而已。諸生日啖籠炊粉羹。一人之食。為鈔五兩。君子以監學為作養人材之地。而千百為羣。恣縱恬嬉。以嫚侮嘲謔為賢行。加屏風以障市人。入茶酒肆。不償值。掉臂而出。是壞天下人材。何作養之有。庚申外史

仁宗即位。國學將釋奠。遣李邦凝致祭於文宣王。點視畢。至位立。殿戶方闢。忽大風起。殿上及

兩廡燭盡滅。燭臺底鐵罇入地尺無不拔者。邦凝悚息伏地。諸執事者皆伏。良久風定。乃成禮。邦凝因慙悔累日。

元史

明

洪武初太祖親定士子巾服。生員襴衫。貢舉入監者不變所服。後許戴遮陽帽。而監生衣藍色。洪熙中帝問衣藍者何人。左右以監生對。帝曰。著青衣較好。乃易青圓領。嘉靖二十二年禮部言士子冠服詭異。有凌雲等巾。甚乖禮制。詔所

司禁之。萬曆二年禁舉人監生生員儒士僭用忠靜冠巾。錦綺鑲履。及張繖蓋。戴煖耳。違者五

城御史送問。

明史輿服志

新舉人朝見著青衫。不著襴衫者。聞始於宣廟。欲其異於歲貢生耳。及其下第送國子監。仍著襴衫。蓋國學自有成規也。

賢奕

永樂間翰林院進所纂錄韻書。賜名文獻大成。以其未備。遂命重修。以祭酒胡儼兼翰林院侍講及學士王景等為總裁。開館於文淵閣。禮部

簡能書監生繕寫辛酉命北京國子監會繕照
本監定例南雍志

正統十年會試時中副榜不就與諸副榜并下
第者九百餘人俱入太學是時李公時勉為祭
酒趙公琬為司業李公極意造就人才初至今
坐堂一月後乃散處於廂房列格致誠正四號
號房中有家室者居外晨入饌堂讀書俱朔望
升堂其於四號督勵尤切夜讀務盡二更將五
更復令膳夫提鈴循號門催喚起讀書或自潛

行以察勤惰無燈者令人暗記明示之責罰自
是燈光達旦書聲不絕學者競相勸勉李公多
宿廂房每隔三五夜必召余同鄉三二人侍坐
談講李公端坐儼然或說鄉曲舊事或論詩文
言簡而確婉而有味聽者忘倦每至更深乃已
別時必曰語久誤工夫自當退補且曰三更
是陰陽交代時讀書宜二更即止不可過過則次
早無精神其愛人多類此彭文憲筆記
京衛武學始於正統六年除教授一員訓導六

員教習勲衛子弟以兵部司官提調之以國子監丞掌學焉宸垣紀畧

謹案

欽定日下舊聞攷監丞即閻禹錫也

正統十一年太師英國公暨侯伯二十餘人早朝畢奏曰臣等皆武夫不諳經典願賜一日假詣國子監聽講上命以三月三日往於是太師率諸侯伯至日到監各攜茶湯果餅之類甚豐祭酒李公時勉命諸生立講五經各一章講罷

設酒饌奉款諸侯伯讓曰受教之地皆就列坐惟太師與先生抗禮飲甚懽太師屢辭公曰秀才家飯不易措置願太師少寬復命諸生歌鹿鳴之詩賓主雍雍抵暮而散此亦太平盛事也

寓圃雜集

舊制國子監錢穀不鉤考為養賢也其後廢會饌而椒鹽等物俱折以錢鈔然不時給諸生多為他用為監丞閻禹錫所訐戶部尚書年富以聞命官覈實自是國子監錢穀鉤考明太學志

閻禹錫初以李賢薦為學正。升監丞。四為同考。

史明

南昌張直閣在翰苑。嘗上疏請令史官行人奉使四方。各求遺書一部。送國學翰林收藏。業已允行。而久之竟無應者。都下所當積書者有五。其一內府監局。當儲其全。以備御覽。其一內閣秘書。當儲其全。以備顧問。其一翰林院庫。當儲其全。以備考訂。其一兩京太學。當儲其全。以備頒行。其一禮部庫房。當儲其全。以備參覈。五者

即不能兼得。一二焉可矣。而今皆無之。徒使坊

肆訛刻日。滋月盛。毀瓦畫墁。寔失舊本矣。彭文憲筆

記

景泰四年。祭酒王恂卒。監丞安貴言。太子少師

侍郎學士蕭鎡任祭酒。諸生悅服。乞照胡儼例。

不妨內閣職務。時來提督儀型。後學上不許。以

太常少卿陳詢代之。永樂中。儼實出為祭酒。不

復入內閣也。言今

景泰中。劉鉉為祭酒。易儲議起。諸司無大小皆

勸進司業言於鉉曰。百司皆勸進。國子監獨無乎。鉉曰。國子監諫止則可。勸進則不可。遂止。後英宗復辟。閱諸疏皆勸進。無國子監名。問徐有貞曰。祭酒何人。官幾年矣。有貞以鉉對。上曰。吾欲一識之。乃召對於文華殿。擢少詹事。守溪筆記天順四年。盛自兩廣入議。八月某日。上有事西壇。忝扈從。衆皆盛服候駕。劉祭酒崇益。倏就前班。偶閣老李公語退。而見告曰。太學有前元時加封。

孔子制碑。以草間。欲具奏重立門下。適請於李公公。言此立則可耳。何用奏。崇益故有僚舊之好。盛因復之曰。此前代所立。若建學時。因而不改可也。今國子監建自我朝。已有御製碑矣。一旦遽立前代詔旨。未宜。若具奏重立。恐亦未當。况加封諸制。已有史傳。聖道輕重。初不繫此。須更商量。其事遂寢。水東日記崇仁洪鐘。生四歲為神童。隨父以訓導考滿。至京。憲宗聞之。召見。命翰林給廩讀書。陞其父國

子助教。以便其子。治世餘聞

謹案明太學志。學正洪朝宗。江西撫州人。由監

生。歷訓導。成化年任學正。疑即其人。存之以備

參考。

成化十八年。太常寺卿掌監事。劉宣。以琉球官

生蔡賓等。束脩有白金一斤。辭不受。後四年。賓

等復申請前事以聞。上命宣受之。明太學志

萬曆十六年。重書寶訓實錄。校對官於翰林院

差委。國書監生於國子監。收管吏役於吏部。取

撥。見聞錄

國家度越前代者。有數事。前代

文廟用塑像。本朝初建國學。改用木主。前朝太學生

皆上書。我朝獨生監。不許陳民間利弊。宋制臺

省六品。諸司五品。一郊而任一人。兩制以上。一

歲而任一人。子又任其孫。孫又任其子。任姪任

甥。亦有之。今三品以上。才得廕子入監。統袴子

弟。所以不濫朝籍。正秘笈

國子監志卷八十二

志餘二

綴聞

順治間翰林王熙工

國書後陞司業

世祖恐其荒廢令與祭酒固爾嘉渾等皆以
國語問答

王士禎以順治庚子為江南同考官得崑山王
朱玉後朱玉為博士有句云秋雨茂林人獨臥

西風汾水雁還來。士禎時為祭酒。題其後云。茂陵秋雨瀟瀟夜。愛爾哦詩四壁秋。多少長安苦吟客。瘦羊博士擅風流。後辛酉甲子兩值科試。矢公甄拔。得士尤衆。如壬戌之史夔等。乙丑之高曜。金居敬等。戊辰之湯右曾。查嗣韓。查昇等。不下數十人。皆一時名士。丁丑會元汪士鋐。亦士禎大學門生也。原名僕。

康熙初。裁兩坊衙門。兼裁侍講。翰林編檢。必歷司業。然後陞侍讀。故是時為司業者。率數月遷

去。康熙十四年。復設坊局。於是修撰編檢。多陞中贊。而司業與之較俸陞轉矣。

康熙間。太學生周清原有詩名。大學士馮溥見其雍試諸作。目為奇才。詩以贈之。曰。尊酒高齋話夕曛。斗間佳氣識龍文。十年閉戶遲遊洛。千里過都早不羣。春草已看傳白傳。飛花定見詔韓君。

九重側席今方切。振筆蓬山為爾欣。後清原果以博學鴻詞授翰林。清原雍試諸作。有太學白丁香詩。

句云。月明有水皆為影。風靜無塵別遞香。一時傳誦都下。上達。

宸聰。比官翰林。

召見。

上猶誦其詩句獎之。

康熙己未。遣太學生孫致彌往朝鮮采詩。大抵律絕居十之九。古詩歌行。略見梗概而已。致彌後登戊辰進士。官翰林。

康熙己巳。嚴虞惇充貢入太學。於時兩司成皆

詞林宿望。以通經學古訓後進。四方知名之士亦多聚於京師。每朔望釋菜。六館之長率諸生。樞衣升堂。執經問難。八旗子弟拱手序立。有園橋觀聽之風。月有課。季有考。公卿大夫皆傳觀其文。以為質的。其平居朋友講習。道德詩書之外。無遊談無勸說。亦時或有杯酒相聚為燕樂。蓋士之砥礪如此。而上之鼓舞作興。又如此。故太學於是為盛。故事國子監生初就舍。自司成以下。凡相臨者。

俱操幣以見。於是。有到監之費。迨歲滿。當咨部授職。必視其月課中程與否。而人之實在監者少。於是。有出咨之費。吳苑為祭酒。曰。師道也。而以市道交可乎。砥礪同官。悉除贄幣。月課中程者。立予咨。不及格者。執不與。諸生遂無一錢之費。而課試無敢不身至者。八旗教習。年滿試吏部。十人中。八人授縣令。二人授州倅。君曰。資格年勞相等。何所分優劣。徒滋弊耳。奏請以教習生兼贄禮儀。歲滿。悉補縣令。以塞倖門。八旗子

弟在官學者。舊不在考校之例。君令一體考校。仍請於

朝鄉會試。量增其額。以示鼓勵。二事皆報可。

進士題名碑。舊建於國子監大成門東。吳鱗潭先生為祭酒時。稽考舊碑。明永樂至崇禎。凡七十八科。碑僅存三之二。

本朝制科。始於丙戌。碑亦列焉。厥後十七科。未之繼也。康熙三十年辛未。謀於

朝。伐石鳩工。豎之。又令吏掘地。徧索。獨永樂碑不

見一日宮牆傾吏諱曰永樂碑得矣於是前後井井用全一代之制又於

啟聖祠中得元碑三。一為正泰國子貢試名記蒙

古色目

別部落降元者謂之色目

漢人列三榜皆有正副一

為至正進士題名記蒙古色目為一榜狀元朶列圖漢人南人為一榜狀元文允中皆無榜眼探花一為至正國子中選題名記蒙古賜正六品色目賜從六品漢人賜正七品亦有正副夫八比取士士不由進士者無由顯達於時此題

名碑之不可不列也乃立而復湮沒非吳公整頓後將何考焉按元朝氏族蒙古有七十二種色目有三十一種金人有三十一種漢人有八種高麗女真契丹渤海皆在漢人內

黃章順德人年近四旬為博士弟子六旬餘試優補廩八十三貢入太學康熙己卯歲北闈秋試年已百歲大書百歲觀場四字於燈令其曾孫為之前導

國子監彝倫堂東西二廳之下為六堂即諸生

講習之所也。雍正八年

賜給方家衙衙官房一所。題曰

欽賜學舍。在監之南。故曰南學。而以衙署稱北學焉。

謹案國子監門。逕自西而東。由集賢左門進署。

自

賜給南學後。於前門照壁之左。開便門以入南學。尚未

通車輿也。乾隆二十三年。重修國子監。乃於照

壁左右立柵欄門。以通車輿。又於集賢門左右

牆間各立柵欄門。自是從東直達署內。不必由

集賢左門矣。

雍正十一年。

詔舉博學宏詞。詹事覺羅吳拜。以現任學正丁凝薦。

順天鄉試。由監錄送者。有南皿北皿中皿字號。

第二名。例取南皿中式。名曰南元。監中錄科。取

列第一名。最利於鄉試。故有監元之稱。

肄業生饒夢燕。湖南人。乾隆十年間。假歸。適遇

苗匪滋事。夢燕率鄉兵殺賊有功。湖廣總督敘

功。奏准加級。

謹案夢燕後以教習期滿選授縣令

乾隆十四年

詔舉經學。大學士張廷玉薦現任助教鍾畹。人品端謹。留心經學。通曉三禮。侍郎觀保亦薦畹。謹厚老成。潛心經學。尚書蔣溥薦現任學正王延年。老成敦樸。沉潛經史。尚書劉統勳亦薦延年。老成。謹飭。潛心經史。侍郎何國宗薦現任助教王之銳。敦本篤行。學有根底。現任學錄蔡寅斗。為人醇謹。學問淹通。

乾隆十六年核實保舉經學之陳祖范吳鼎梁錫璵顧棟高等四人吳梁並授司業

召對於

勤政殿

諭云。你們以經學保舉。所以用你們去教人。如今大學士九卿等公保你們。是你們積學所致。不是他途倖進。復

諭云。經是讀書的根本。但窮經不徒在口耳。須要躬行實踐。你們自己躬行實踐。方能教人躬行實踐。

國子監兩廂官試俱在彝倫堂。乾隆二十三年重修衙署。遇鄉試錄科。在南學率性堂考試。謹案乾隆二十三年就南學考試。三十二年重修。

文廟彝倫堂正中安置

先師神牌及四配十二哲。率性堂安東廡。修道堂安西廡。誠心堂收貯廟庫器物。是年又遇鄉試。本監錄科季考月課俱在崇志堂。拔貢生潘湘。湖南人。乾隆年間。琉球官生入監。

肄業。監臣派充教習。編輯琉球入學見聞錄四卷。自星野針路。以至風俗語言。悉為詳載。藁本存貯。

御書樓相後成進士。出宰福山。

文廟樹木俱太常寺種植。

彝倫堂甬路兩旁樹木。則工部種植。

大成門外甬路東。柏樹四十一株。西。柏樹三十四株。

大成殿前甬路東。柏樹二十四株。西。柏樹二十二

株

彝倫堂前東柏樹二株槐樹二株西柏樹八株

古槐一株槐樹二株

辟雍殿前東柏樹二十株槐樹五株西柏樹二十

株槐樹五株

太學二門外甬路東柏樹五株槐樹三株西柏

樹八株槐樹二株

崇聖祠門外甬路東柏樹二株西柏樹一株

後殿甬路東柏樹六株西柏樹六株西旁槐樹一

株後牆槐樹一株

敬一亭內甬路東柏樹二株槐樹二株桑樹一

株榆樹一株西柏樹一株槐樹一株桑樹一株

榆樹四株後身榆樹四株

土地廟內甬道東槐樹一株西槐樹一株廟門

外槐樹一株

御書樓大門內槐樹一株樓前東槐樹二株西槐樹

二株

東廂敬思堂前藤花二株丁香二株甬路東槐

樹二株。西槐樹二株。杏樹一株。西耳房旁椿樹一株。

西廂二堂前東槐樹一株。西槐樹一株。

南學後門內槐樹二株。率性堂槐樹二株。椿樹

三株。桑樹一株。修道堂槐樹四株。桑樹二株。誠

心堂槐樹三株。桑樹一株。正義堂桑樹二株。榆

樹一株。椿樹一株。崇志堂槐樹二株。榆樹一株。

桑樹一株。廣業堂桑樹三株。椿樹二株。公所前

桑樹一株。內槐樹二株。桑樹一株。

以上共二百九十二株。

附

元

至大間許文正公衡以集賢大學士兼祭酒自

開學後家事悉委其子師可凡賓客往來學中

者皆謝絕之嘗謂學中若應接人事諸生學業

必有所妨外人謗怒是我一己之事諸生學業

迺上命也又以蒙古生習學算術遂自唐堯戊

辰距至元壬申凡三千六百五年編其世代歷

年為一書。令諸生誦其年數而加減之。教諸生習字。必以顏魯公為法。嘗曰。書固六藝之一。程先生謂一向好著。亦自喪志。然其作字時甚敬。謂只此是學。此可為法。諸生讀書之暇。令蒙古生年長者習拜友。受宣拜詔儀。釋奠冠禮時亦習之。小學生有倦意。令習跪拜揖讓進退應對之節。或投壺習射。負者罰讀書若干遍。國學事蹟

平章魯國文貞公博果密。年十二。從學於許文正公。嘗令諸生值日以謝客。至公則持書崇朝。

永夕。坐中門不移。否則擁篲掃灑。褰簾操杖。出必乘馬導前。無馬徒從。循循安之。其敬以孝。猶子事父。惟恐斯須仁義之言不聞。道德光輝。不接也。牧庵文集

博果密受學於國子祭酒許衡。日記數千言。衡每稱之。以為有公輔器。世祖嘗欲觀國子所書。字。公年十六。獨書貞觀政要數十字以進。帝知其寓規諫意。嘉歎久之。衡纂歷代帝王名諡統系。歲年為書授諸生。公讀數過即成誦。帝召試。

不遺一字。元史本傳

耶律有尚為許文正衡高弟。十二齋長伴讀中一人也。衡告免。朝廷乃以有尚等為助教。久之除祕書監丞。自有尚去。而國學事頗廢。廷議以為非有尚無足以繼衡者。除國子司業。時學館未建。師弟子皆寓居民屋。有尚屢以為言。二十四年。朝廷乃大起學舍。始立國子監官。而增廣弟子員。於是。有尚升國子祭酒。儒風為之丕振。

元史本傳

至大元年。召吳澄為國子監丞。先是許文正公衡為祭酒。始以朱子小學等書授弟子。久之。漸失其舊。澄至。旦燃燭堂上。諸生以次受業。日昃退燕居之室。執經問難者接踵而至。澄各因其材質。反覆訓誘之。每至夜分。雖至寒暑不易也。皇慶元年。升司業。用程純公學校奏疏。胡文定公六學教法。朱文公學校貢舉私議。約之為教法四條。一曰經學。二曰行實。三曰文藝。四曰治事。未及行。澄一夕謝去。諸生有不謁告而從之。

南者元史本傳

國學故事。伴讀生以次出補吏。莫不爭先出。時有一生。親老且貧。同舍生有名在前者。因博士以告曰。我齒頗少。請讓之先。賡曰。讓德之恭也。從其讓。別為書薦其人。朝廷反先用之。自是六館之士。皆知讓之為美德也。元史劉賡傳

至大四年。仁宗即位。嘉尚儒術。臺臣言。齊履謙有學行。可教國學子弟。擢國子監丞。改授國子司業。與吳澄並命。時號得人。每五鼓入學。風雨

寒暑未嘗少怠。其教養有法。諸生皆畏服。未幾復以履謙僉太史院事。自履謙去。國學吳澄亦移病歸。學制稍為之廢。延祐元年。詔擇善教者。於是復以履謙為國子司業。履謙律已益嚴。教道益張。每齋置伴讀一人為長。雖助教闕員。而諸生講授不絕。時初命國子生歲貢六人。以入學。先後為次第。履謙曰。不攷其業。何以興善而得人。乃酌舊制。立升齋積分等法。自是人人勵志。多文學之士。元史本傳

至大四年八月芝生國學

大成殿延祐二年三月芝生

大成殿五年七月芝生

大成殿元史五行志五

至正二十年十月朔甘露降於國子監

大成殿前柏木元史順帝紀

國子監候日影到堂後梨樹散學金臺集

謹案虞集有國子監後圃梨花樂府序

虞集除國子助教即以師道自任諸生時其退

每挾策趨門下卒業他館生多相率詣集請益

除博士監祭殿上有劉生者被酒失禮俎豆間

集言諸監請削其籍大臣有為劉生謝者集持

不可曰國學禮義之所出也此而不治何以為

教仁宗在東宮傳旨諭集勿竟其事集以劉生

失禮狀上之移詹事院竟黜劉生仁宗更以集

為賢大成殿新賜登歌樂其師世居江南樂生

皆河北田里之人情性不相能集親教之然後

成曲復請設司樂一人掌之以俟考正元史本傳

天歷時富珠哩种兼祭酒种以古者教育有業退必有居舊制弟子員初入學以羊贄所貳之品與羊等种曰與其饜口腹孰若為吾黨燥濕寒暑之虞乎命搏節之得錢二萬緡有奇作屋四區以居學者諸生積分有六年未及釋褐者种至皆使就試而官之論者謂自許衡之後能以師道自任者惟耶律有尚及种而已元史本傳

至順辛未成遵入成均為國子生時陳旅為助教喜其文數以語於奎章閣侍讀學士虞集集

亟欲見之旅令以已馬俾遵馳詣集集方有目疾見遵來迫而視之曰適觀生文今見生貌公輔器也吾老矣恐不及見生當自愛重也元史本傳

王思誠至正元年遷司業二年拜監察御史調祕書監丞會國子監諸生相率為鬪復命為司業思誠召諸生立堂下黜其首為鬪者五人罰而降齋者七十人勤者升惰者黜於是更相勉勵元史本傳

至正初召張翥為助教分教上都生後以翰林

侍讀兼祭酒。翦勤於誘掖。後進絕去崖岸。不徒以師道自尊。用是學者樂親炙之。有以經義問難者。必歷舉衆說。為之折衷。論辯之際。雜以談笑。無不厭其所得。而後已。元史本傳

蘇天爵。由國子學生公試。名在第一。釋褐授薊州判官。至正四年。為集賢侍講學士。兼國子祭酒。天爵自以起自諸生。身為師表。端己悉心。以

範學者。同上

明

永樂初。北監初建。維時司業貝泰署印。朝議以張顯素諳典章。乃奏改北監丞。顯至。經歷學舍。勸懲淑慝。百廢俱興。諸生數千人。肅然敬服。黃佐

撰張顯傳

徐有貞。初名瑄。年十三。謁國子祭酒胡儼。儼時自矜重。稱疾。憑几見。試瑄詩。即起循牀行。大詫賞曰。子自愛。他日國器也。名卿續紀

博士王復原。為人儉約。質率無崖岸。嗜為文章。在監十餘年。求為文者。日接踵戶外。未嘗有厭

倦意所著文集若干卷藏於家。東里文稿

宣德七年四月給監生房舍月糧北國子監言今監生不啻數千多有挈家來者僦屋以居監之東金吾等三衛草場二所乞賜諸生建房室其閒地給本監種蔬菜以供會饌悉從之命行在工部為構房舍給師生會饌什器復命戶部給生有家室者月糧皆如南京例。學典司業趙琬在太學十有七年規矩整飭修德講學教人有序始至嘗議脩胡安定湖學之教職

居佐貳勢莫得行公處已甚節儉而急於周人之急太學諸生中有親在遠方弗及養者必致書郡縣俾存問之又設藥房選諸生知醫者五六人領其事以己資置藥物其中以濟人之急又買地都城之北環植萬柳名萬柳庄以葬凡喪之不能歸者。商文毅公集

學正魏齡潮州人初至嘗侍祭酒李公時勉言曰昨聽選部中見羣衆相語但問某處地方好某地有出產不聞一人以施政教為言者皆若

此天下安得治李聞其言甚善之謂予曰新學

正有識能言諸人所不能言也魏後復姓李守

官清白不受諸生贄禮果不負所知云彭文憲筆記

丁卯冬湖廣永濟縣進須知官在途夢開黃榜

第一名彭時國子監生其人至京言於永濟監

生張本端本端訪知予姓名異之數與朋輩言

之已而果然同上

李時勉與陳敬宗同在翰林袁宗澈嘗相之敬

宗儀觀魁梧時勉貌稍寢袁曳二人並列曰二

公他日功名相埒後二人同時為兩京祭酒明太

學志

李時勉請改建太學上命太監王振往視振權

傾天下時勉與抗禮而振之生日諸大臣皆賀

惟時勉不往每進香

文廟司成設茗筵款之時勉獨否振銜之密廉其事

無所得彝倫堂前舊有大樹嫌其一面陰翳妨

諸生班列稍令伐去旁枝振以為擅伐官樹供

私爨遂矯旨與司業趙琬掌饌金鑑俱逮方逮

時時勉方坐東廂考業。錦衣官校猝至掩卷起。免冠受桎梏。諸生皆錯愕失次。時勉神色自若。呼諸生前徐語曰。某人某處講是。某處非是。某勝某。縷縷如平時。因顧囑僚屬令終事。乃行。

明史

本傳

景泰二年。王恂以右春坊右庶子管司業事。誘迪諸生。循循勿倦。四年陞祭酒。初。楊文定公秉國。恂從之游。謹厚不譁。稱之曰。吾鄉若恂者。其文行忠信士乎。

學典

景帝時。以國計不足。放遣諸生。不願歸者。停其月廩。祭酒劉絃言。養才國家急務。今倉廩尚盈。奈何靳此。遂得復給。又令甄別六館生。年老貌寢。學藝疎淺者。斥為民。絃言。諸生荷教澤久。豈無片長。况離親戚。棄墳墓。艱苦備至。一旦被斥。非朝廷育才意。乞揀年貌衰而有學者。量授之官。奏報可。絃性介特。言行不苟。課諸生。規條嚴整。仲子瀚。以進士使南方。瀕行。閱其衣篋。比還。篋如故。乃喜曰。無玷吾門矣。

明史本傳

陳詢判國子監獎拔士類甚眾若嚴銓邱濬楊繼宗彭韶施槃輩後皆為名臣學典

景泰五年國學生諫幸佛寺時京師隆福寺成雄麗擬王者宮車駕臨幸已除道太學生楊浩等上疏言陛下即位之初首幸太學海內之士聞風快覩今又幸儒術而重佛教豈有聖明之主事胡鬼而可垂範後世者耶太學生姚顯又言王振竭生民膏血修大隆興寺窮極壯麗車駕不時臨幸夫佛本西夷之人信之得禍梁武

帝足為前車之鑒請自今凡內臣所修寺院悉毀之以修倉廩之用勿復興作萬世之法也自正統至天順京城內外建寺二百餘區大臣諫官不言而二生言之一時嘆服同上

李少保賢自郎署至閣老劉崇益繇方面入為大司成水東日記

成化六年五月命襲封衍聖公在國學讀書國子監丞李伸言前襲封衍聖公孔宏緒自幼失學長而狎近羣小以至干冒刑憲聖明念先聖

之裔特加寬宥草職為民即命其弟宏泰襲封
 恩至渥然不豫教之仍恐復蹈前轍伏望留之
 京師賜以館舍令之隨侍班行獲覩禮制退則
 存留太學受教師儒俟其學成遣歸奉祀禮部
 覆奏宣準其言留宏泰在監讀書一年然後許
 歸仍給與牙牌懸帶及朔望併時節隨班朝參
 從之

學典

周洪謨成化十一年為北監祭酒言士風澆淨
 請復洪武中學規帝嘉納命禮部榜諭崇信伯

費淮入監習禮久不至洪謨劾之奪冠帶以儒

中赴監停歲祿之半學政肅然

明史本傳

成化十二年以司業耿裕為祭酒時勲戚子齒
 幼在國學者裕恐其難教取所當習讀古今嘉
 言懿行為韻語授之他日有獻於上閱之嘉嘆

學典

林大猷任學錄時關洛晉魯之士執經從游者
 數百人齋舍至不能容輪番聽講又約日通集
 太學諸生聽講謂之普講進監丞盡別宿弊講

學益勤。後升翰林院檢討。仍掌監丞事。同上

祭酒邱濬。博學強記。世無與比。時士子為文。以

奇怪相高。或不可句。濬為祭酒。諄諄為學者言。

之文體。乃復渾厚。其掌太學踰十年。論者謂師

道尊嚴。無愧李時勉。而綜理微密。過之。明太學志

陳獻章。成化丙戌。復游太學。祭酒邢讓。令和楊

龜山。此日不再得。詩云。能飢謀藝。稷冒寒。思植

桑。少年負奇氣。萬丈磨青蒼。夢寐見古人。慨然

悲流光。吾道有宗主。千秋朱紫陽。說敬不離口。

示我入德方。義利分兩途。析之極毫芒。聖學信

匪難。要在用心臧。善端日培養。庶免物欲戕。道

德乃膏腴。文辭固粃糠。俯仰天地間。此身何昂

藏。胡能追軼駕。但能漱餘芳。持此木鑽柔。其如

磐石剛。中夜攬衣起。沉吟獨徬徨。聖途萬里餘。

髮短心苦長。及此歲未暮。驅車適康莊。行遠必

自適。育德貴含章。邇來十六載。滅迹聲利場。閉

門事探討。蛻俗如驅羊。隱几一室內。兀兀同坐

忘。那知顛沛中。此志竟莫強。譬如濟巨川。中道

奪我航。顧茲一身小。所繫乃綱常。樞紐在方寸。操舍決存亡。胡為謾役役。斷喪良可傷。願言各努力。大海終回狂。讓覽之驚曰。龜山不如也。為之延譽。由是名動京師。一時名士皆與之游。同上

成化二十三年。國子監生虎臣聞萬歲山架樓棚。以備登眺。上疏極諫。上奇之。祭酒費閻不知也。懼其賈禍。乃會六堂鳴鼓聲罪。鐵索鎖項。以待。俄有官校宣臣至左順門。中官傳溫旨勞之。曰。爾言是也。樓棚即斥卸矣。命吏部銓選。特與

臣七品正官。

同上

宏治三年。以諭德林瀚為祭酒。瀚閩人為祭酒。垂十年。待諸士嚴而有恩。故事祭酒膳役銀歲。且百。瀚悉貯官。構祭酒公署及監中諸師儒寓舍。進禮部侍郎。仍掌監事。時稱公賤者即之。不知其為貴。卑者即之。不知其為尊。不肖者不知其為賢且智。獨非意相干者。始知其凜然不可犯也。

犯也。學典

林文安瀚子庭機。南部大宗伯。孫爌亦南部大

宗伯三代典成均徐應秋談薈

謝鐸任北監祭酒請增號舍修堂舍又謂廟門

衢面多狹斜以為褻慢買其地而廓之又買官

廨三十餘區居學官以省僦直皆出夫阜顧役

餘悉藉為公用諸生貧困者亦有給死者請京

府致賻給驛歸其喪空同集

國子博士徐禎卿神清體弱雙瞳燭人著交誠

感暮二賦凌躡曹魏長宿驚歎稱為文雄國寶新編

納粟一塗人輒輕之在庠士下乃羅圭峰七試

有司不錄入貲北雍竟中解元人顧自立小試

未足以定天下士也湧幢小品

趙司成永號類庵京師人一日過魯學士鐸邸

魯公曰公何之司成曰憶今日為西涯先生誕

辰將往壽焉魯公曰吾當與公偕公以何為贄

司成曰帕二方也魯公曰吾贄亦應如之入啓

笥索帕無有躊躇良久憶里中曾餽有枯魚令

家人取之家人報已食僅存其半魯公度家無

他物即戴其半與趙俱往稱祝西涯烹魚沽酒

以飲歡甚。即事倡和而罷。賢奕

魏校為祭酒。風格整肅。士人凜凜奉其規程。其

生平雅慕聖賢體用之學。肆力典墳。博求於仰

觀。俯察經畧。民物事。鉅細證究。且曰。當於斂處

為舒。復求之靜坐。以證其本。內外交養。於事必

先有成法。儼然朝夕守而弗渝。學典

許誥為祭酒。宏獎風節。絀抑華競。以經世為士

筌。尊德為學軌。一時士人翕然化之。不僅以敦

悅典墳。涉志絃誦而已。時太學生有遐方旅櫬。

暴露無歸者。幾三十人。歲時名字漫滅。無稽。公

乃以公帑羨餘。購地葬之。復察生理窮迫。衣食

弗給者數十人。周恤之。由是生徒感德。懷服。又

奏罷不稱職者。及劾勲戚習禮不律者。一時成

均條約。肅然改觀。同上

錢德洪。嘉靖中。補北監丞。羣國學弟子。立繩愆

廳下。諭以悔吝吉凶之道。聞者悅服。同上

祭酒呂柟。立教皆躬行以率之。以正心修身忠

君孝親為本。季試諸生。必刻其文之優者。以式

德行稱著者則揭之榜。仍早撥歷以示勸。病者問而醫之。死者賻而歸之。間取儀禮及為詩樂圖譜。分日講解。禮義之俗。弦歌之聲。洋洋於京師。首善之地。雖歷事監生。觀政進士。向學中官。亦從而質疑問難焉。識者以為自宋吳李章四祭酒外。鮮見其比。明太學志

王守仁傳習錄始出。士大夫多力排之。尤時熙見之。嘆曰。道不在是乎。向吾役志詞章未矣。後為國子博士。祭酒徐階命六館士咸取法焉。居

常以不獲師事守仁為憾。聞郎中劉魁得守仁之傳。遂師事之。明史本傳

萬歷丙子。神宗幸太學。司業沈淵進講。尚書賜白金文綺。宴於闕門。時都試屆期。諸生雲集。淵攝大司成。矩度甚嚴。少所假貸。貴游高第。凜凜步趨。莫敢關請。國學為之改觀。于慎行撰墓表

祭酒劉元震。在講筵。故事。講官不典成均。公恬然從事。日以黽勉。率諸屬。諸屬為公稱勞。且姍笑為虛文。公謂檢束士習。高皇帝所以立教也。

此而虛文將安取實益精課勤惰置彰善紀過
 二冊以旌別之又申明賢關造士之意必以敦
 行為先文章力還爾雅非經籍布在學宮者諸
 生毋得輒肄學典
 盛訥為祭酒首訓士收攝此心隨處體驗謂方
 寸一空百事可為次教以治事明經歌詩習字
 因材陶冶人謂有涇陽先生之遺風焉同上
 太常寺卿管祭酒事范謙整飾監規人謂公五
 日京兆耳何須爾對曰居一日官作一日事敢

視為傳舍乎同上

成基命萬歷癸巳以特選入太學時葉向高為
 祭酒每語人曰成子公輔器也雍事竣不受銓
 除益力學後成進士以洗馬管司業事敦尚風
 節為太學先畿輔通志
 方從哲為祭酒大璫田義有姪甫入監三日即
 欲撥厯持之不可義恚使語曰若不愛官耶何
 此小事遽相拒絕遂請告歸學典
 祭酒李廷機起家太學嘗謂洪武時諭旨稱宋

訥學規嚴肅。所以人材衆多。又見每日升堂。有兩生抱牌。牌書整齊嚴肅字。亦洪武中所製也。奈今之教人。不守國初之法。而遠引敷教。在寬之文。夫所謂寬者。多方勞來輔翼。欲其自得之。謂豈以縱馳為寬哉。故教士一以整齊嚴肅為主。拜興有節。課講有程。差撥必公。曠壓不貸。學

規肅然。

同上

姜逢元由中允晉國子司業。署監事。時諸生寥寥。乃多方羅致。一月得數百人。日事課試。面進

而殿最之。諸生奮臂向學。監中有積蠹。名蘇意。王妻妾宮室。擬於公侯。侵號舍租銀。諸生廩餼。及修膳工料。無算。身有奧援。人不得問。乃設計擒捕。追所侵欺。還官。學政為之一清。同上

蔡毅中在成均。兢兢以斥私奉公。掖勤勵情。為求己之事。雖謗怨沸騰。視一綬不啻飄絮。四齡便能搦管。弱冠成名。自五經百家。天文草木。無不窮其源流。旨趣異同。輕重是非。得失之歸。隨筆所見。久而成帙。如字覺要覽。會編廣規。而外

則六經解火攻書皆進呈其他著錄甚多上同蔡毅中以禮部右侍郎領祭酒事楊連劾魏忠賢得嚴旨毅中帥其屬抗疏言學校者天下公議所從出也臣正與諸生講為君難一書忽接楊連劾魏忠賢疏合監師生千有餘人無不鼓掌稱慶乃皇上不下其奏於九卿而謂一切朝政皆親裁以奸璫為忠代之受過合監師生無不捫心愁歎不已也二十四罪無一不當悉究舉朝羣臣欲於朝罷跪以候旨忠賢遂要皇上

入宮不禮羣臣今又欲於視學之日羣臣及太學諸生面叩陳請矣乞將連疏發九卿科道從公究問疏入忠賢戟手大詢毅中乃再疏乞歸不許已嗾其黨劾罷之

明史本傳

天啓四年八月署國子監祭酒禮部右侍郎蔡毅中監生金維基博士門洞開鄧光舒王裕心助教張翰南徐伯徵姚士儒孫士裕董天允學正王永興蔣紹燿學錄聶翔杜士基典簿萬民懋典籍陳烈公疏劾魏忠賢上不問毅中既與

璫忤四疏請告亦不許

明史紀事本末

天啓七年五月監生陸萬齡等請建魏忠賢祠

於國學之旁謂

孔子作春秋而忠賢作要典

孔子誅少正卯而忠賢誅東林許之八月信王即皇

帝位國子司業朱之後劾監生陸萬齡等請祠

魏忠賢國學宜罪命下獄

同上

上虞倪公元璐為祭酒時與溫體仁忤將請告

惠安鄭仰田者善拆字過於官人席上初未通

名倪取骰子中以緋飾四者予卜鄭曰京官四

品而掌印者惟祭酒耳公其祭酒倪公耶公領

之復曰公必與當事者忤姓名中帶骨字者其

人也骰子骨所成而四面稜角不能刊圓故知

不合也又曰公意欲圖歸乎必得請矣骰體方

類口四亦類口乃回字也後果然

觸字

嘗聞阮安督工建太學時悉取前元進士碑磨

去刻字置之隙地今三年一立石皆此物也若

新建廟學之碑則即程鉅夫國子學先聖廟碑

石。而又屬之鉅夫裔孫南雲書之。當時亦以為
非偶然之故也。水東
日記

